

C A P U T VII.

AJAS UXOREM DUCIT.

1. Tum BHOJAS, *Vidarbhæ* rex, sororem suam cum marito idoneo conjunctam, veluti DEVASENAM cum SKANDA, secum ducens, urbem ingredi paratus erat.

2. Reliqui principes etiam, planetarum matutinarum instar paullum splendentes, in exercituum suorum castra abierunt, propter desiderium suum de INDUMATI obtinenda frustratum in vultu et habitu iram exprimentes.

3. SACHIS scilicet propinquitatis potentia nemo ibi erat, qui mariti electionem turbasset; ideo etiam regum cœtus, quamquam KAKUTSTHIDÆ succensens, quietus mansit.

4. Sponsus cum uxore ingressus est viam regiam, undique recentibus donis stratam, portis INDRAE arcus instar splendentibus ornatam, vexillorumque umbra a solis ardore defensam.

5. Tum urbis feminæ in ædibus, aureis fenestris instructis, illum videre cupientes, aliis operibus neglectis, hæc fere agebant :

6. Alia, subito ejus videndi caussa accurrens, crines, quorum corona vinculo soluto in aere volitabat, manu quidem tamdiu continuit, sed religare non cogitavit.

7. Alia, pedem a famula ornatrice sustentatum, pigmentoque stillantem retrahens, incessu jucundo neglecto, usque ad fenestram semitam duxit lacca distinctam.

8. Alia, dextrum oculum collyrio ornata, sinistro adhuc vacuo, eodem modo ad fenestram accurrit, penicillum manu tenens.